

UTUSAN MALAYSIA (DAERAH NEGERI) 9 JUN 2016 m/s 22

Kakitangan, pelajar UMP hasilkan 1,400 bekas bubur lambuk

PEKAN 8 Jun - Seramai 250 kakitangan dan mahasiswa Universiti Malaysia Pahang (UMP) meriahkan program memasak bubur lambuk sempena Majlis Berbuka Puasa bersama Tengku Mahkota Pahang, Tengku Abdullah Sultan Ahmad Shah di dataran Pusat Aktiviti Pelajar UMP, di sini hari ini.

Program selama empat jam bermula pukul 10 pagi itu menghasilkan 1,400 bekas bubur lambuk untuk diedarkan kepada seluruh warga UMP dan penduduk setempat.

Ketua program, Sallehudin Md. Derus berkata, acara tahunan itu diadakan buat kali pertama di kampus Pekan dan mendapat sambutan cukup menggalakkan terutama dalam kalangan mahasiswa.

"Sebelum ini acara memasak bubur lambuk yang merupakan

program wajib setiap kali Ramadhan tiba diadakan di kampus Gambang dan bandar Kuantan.

"Kali ini program diadakan di Pekan sempena Majlis Berbuka Puasa bersama Tengku Mahkota Pahang dan saya lihat mahasiswa begitu teruja dengan rata-rata antara mereka gembira dengan pengalaman baharu memasak bubur lambuk dalam kuantiti yang banyak," katanya kepada *Utusan Malaysia*.

Yang turut hadir menyediakan juadah bubur lambuk itu ialah Naib Canselor UMP, Prof. Datuk Dr. Daing Nasir Ibrahim dan Timbalan Naib Canselor (Hal Ehwal Pelajar dan Alumni) UMP, Prof. Datuk Dr. Yusarie Zainuddin.

Sementara itu, seorang mahasiswa, **Luqman Hakim Aminnudin**, 18, berkata, dia sangat gembira kerana memperoleh pengalaman memasak bubur

lambuk di dalam kawah bersama rakan-rakan baharu.

"Pengalaman pertama dengan ikatan silaturahim yang baharu dibina sangat menyeronokkan. Program seperti ini bukan sahaja mengimarahkan Ramadhan malah dapat mengukuhkan persaudaraan sesama kami," katanya yang sedang mengikuti pengajian dalam jurusan Kejuruteraan Mekanikal.

Bagi mahasiswa Diploma Kejuruteraan Elektrik, Nik Muhammad Rasydan Mohd. Rosli, 18, dia berbangga kerana secara sukarela hadir ke dalam program yang mungkin dilihat biasa pada sesetengah orang, sebaliknya memberikan makna yang cukup besar kepadanya.

"Program seperti ini sangat bagus kerana dapat memupuk sikap bekerjasama antara satu sama lain," ujarnya.



DR. DAING NASIR IBRAHIM (lima dari kiri) dan Dr. Yusarie Zainuddin (tiga dari kiri) turut membantu pelajar dan kakitangan UMP memasak bubur lambuk dalam Program Memasak Bubur Lambuk di Pekan, Pahang.